



Caderno da crítica

Cuestionario Proust: Rosalía Fernández Rial

[Ramón Nicolás 7 Abril 2014](#)

1.– Principal trazo do seu carácter?

-A abstracción. Así, sen concretar.

2.– Que calidade aprecia máis nas persoas?

-A Honradez, en especial na modalidade de impulso irreprimible.

3.– Que agarda das súas amizades?

-Que sexan como son. Mais, postos a pedir, “Amor” (a poder ser, platónico).

4.– A súa principal eiva?

-Pisar ás miñas parellas de tango. Coa muiñeira, o rock ou a salsa non me pasa (aclároo por se alguén que nos estea lendo me quere sacar a bailar). En calquera caso, esa debe ser unha eiva secundaria. A principal penso que é a dúbida perpetua, mais non estou moi segura.

5.– A súa ocupación favorita?

-A ningunha actividade que me entusiasme lle chamaría “ocupación”.

6.– O seu ideal de felicidade?

-Ser Feliz.

7.– Cal sería a súa maior desgraza?

-Aquela que tivera menos graza.

8.– Que lle gustaría ser?

-Un personaxe de ficción.

9.– En que país desexaría vivir?

-En Fantasía. E, de non ser posible, no das Marabillas.

10.– A súa cor favorita?

-A da Utopía.

11. – A flor que máis lle gusta?

-A das “cen follas”.

12.– O paxaro que prefire?

-A Ave Fénix.

13.– A súa devoción na prosa?

-Ser moi devota duns poucos magos. E, logo, deixarme sorprender.

14.– E na poesía?

-Aínda máis.

15.– Un libro?

-Sí, por favor. Grazas.

16.– Un heroe de ficción?

-Robin Hood existiu?

17.– Unha heroína?

-A de Trainspotting parece boa.

18.– A súa música favorita?

-Sempre depende do momento.

19.– Na pintura?

-Tamén.

20.– Un heroe ou heroína na vida real?

-Mataríame se revelase a súa identidade.

21.– O seu nome favorito?

-O dese/a heroe/heroína real.

22.– Que hábito alleo non soporta?

-O de copiar e pegar sen citar.

23.– O que máis odia?

-Que o ser humano sexa capaz de odiar.

24.– A figura histórica que máis despreza?

-A de quen coartou a liberdade, en calquera das súas formas.

25.– Un feito militar que admire?

-O dos Jedis contra os Siths, son os únicos exércitos nos que creo.

26.– Que don natural lle gustaría ter?

-O das ilusionistas.

27. – De que maneira lle gustaría morrer?

-En escena, tras a mellor función da miña vida.

28.– Cal é o seu estado de ánimo máis habitual?

-O onirismo con alucinacións.

29.– Que defectos lle inspiran máis indulxencia?

-Os infantís. As cativas e cativos poden “facer de min un pandeiro”, expresión moi de Celso Emilio –de quen, si, son devota-.

30.– Un lema na súa vida?

-Miña avoa materna, Lema Touriñán.